

1 TESALONICENSES

Saludo

¹ Núa Pablo, Silvano yáapicha, áibaalí ípidenéeri Silas, Timoteo yáapicha nacái nutànàacué pírí cuyàluta, píacué wéenánái yeebáidéeyéica Jesucristo itàacái Tesalónica ìyacàlená mìnánái, píacué ìyéeyéica abédanamata Wáaniri Dios yáapicha, Wáiwacali Jesucristo yáapicha nacái. Wawàwalicué pía. Wía apóstolca, wasutáca Dios ícha pírípínacué imànínápínacué pírí cayábéeri mawèníri iyú, imàcáanápínacué pìyaca matuíbanáiri iyú nacái.

El ejemplo de fe que daban los de Tesalónica

² Macái imanùbaça wasutácaalí Dios ícha pírípínacué, wàaca irí cayábéeri píwalicué macáita.

³ Wàaca Wáaniri Dios iríwa cayábéeri mamáalàacata píibaidacáinacué Dios irípiná cachàiníri iyú peebáidacáinacué Jesucristo itàacái. Wáalía nacáiwa piyúudàacuéca áibanái manuísíwata cáininácáinacué piicáca Dios. Wáalía nacáiwa picùacuéca manuísíwata Wáiwacali Jesucristo yàanàanápíná àniwa, íná yéewa píidenìacuéca piùwichàanáwa matuíbanáiri iyú idècunitàacá namànicuéca pírí báawéeri ìwalíise yái peebáidáanacuéca Jesucristo itàacái.

⁴ Píacué wéenánáica, cáininacuéca Dios iicáca pía. Wáalíaca nacáiwa Dios idéca yeedácuéca pía yàasu wenàiwicacaténacué pía.

⁵ Wacàlidacaalítécué pírí Jesucristo iwasàaca wenàiwica Dios yàasu yùuwichàacáisi ícha, càmítaté

wacàlidacáitacué piríni yáawami tàacáisi iyú meedá, néese wacàlidacatécué piríni Espíritu Santo ichàini iyú, wáalíacaté nacáíwa báisíiri iyú báisícani yái tàacáisi wacàlidéerica. Píalíacué nacáíwa amaléeri iyú wàyacaté machacàníiri iyú pèewibàa, wayúudàacaténácué pía, íná píalíacuéwa wacàlidacaté píri Dios itàacái báisíiri iyú.

⁶ Wía apóstolca, wáalíacawa Dios yàasunáica píacué, bàaluitécáiná pidàbacué pìyaca machacàníiri iyú càide iyúwa wáasáidáanátécué píri, càide iyúwaté nacái Wáiwacali ìyáaná. Yá peebáidacatécué Jesucristo itàacái casímáiri iyú, càide iyúwaté Espíritu Santo imàacáanácué casímáica pía, éwitaté áibanái càmíiyéi yeebáida nàuwichàidacáanítacué pía báawanama peebáidacáinácué Jesucristo itàacái.

⁷ Càita píasáidacuéca áibanái irí càníncaalí iwàwacutáaná neebáidaca, macáita yeebáidéeyéica Jesucristo itàacái, ìyéeyéica Macedonia yàasu cáli íinata, Acaya yàasu cáli íinata nacái.

⁸ Wáalíacawa pimàacacué madécaná áibanái náalíacawa Wáiwacali itàacái ìwali, càmíirica abéta níara ìyéeyéica Macedonia yàasu cáli íinata, nía nacái ìyéeyéica Acaya yàasu cáli íinata, néese macái cáli imanùbaca manùbéeyéi wenàiwica náalíacué piináwaná ìwali. Náalíacawa peebáidáanácué Dios itàacái, íná càmita iwàwacutá wacàlidacuéca nalí piináwaná ìwali.

⁹ Néese, níata icàlidaca ìyaca walí piináwanácué ìwali, íná náalíacawa wapáchíanácué pía bàaluité, pítàidacatécué wía cayába, péemíacatécué nacái wàasu tàacáisi. Piyamáidacatécué píaca ídolo icàaluíniná, níara cuwáiná yéenáiwanáca, yá pimàacacatécué píawawa cáuri Dios irí, yái báisíirica,

peebáidacaténácué itàacái, píibaidacaténácué irípiná nacái.

¹⁰ Nacàlidaca nacái walí picùacuéca Jesús yàanàaca chènuníse àniwa, yái Dios Iirica, Dios imichàidéericaté yéetácáisi íicha. Yácata Jesús iwasèerica wía Dios yàasu manuíri yùuwichàacáisi íicha, yái yùuwichàacáisi yàanèeripináca èeri imáalàacaalípináwa.

2

El trabajo de Pablo en Tesalónica

¹ Iná píacué wéenánáica píalíacuéwa Dios imànicatécué pirí cayábéeri wapáchiacaalícué pía bàaluité.

² Péemlàcatécué waináwaná ìwali, wía apóstolca, ipíchawáiseté wàanàacué píatalé, yáté Filipos ìyacàlená mìnanáí namànicaté walí máini báawéeri, nataànicaté nacái wàwali báawéeri iyú idècunitàacá nàuwichàidaca wía ìwalíse yái wacàlidáanáca Jesucristo itàacái. Quéwa Dios iyúudàacaté wía wàanàacaténáté pìyacàle nérécué wacàlidáanápínácué piríni macàaluínináta, yái tàacáisica íiméerica Jesucristo iwasàaca wenàiwica Dios yàasu yùuwichàacáisi íicha, éwitaté áibanái nàuwidecáanáta namànica wía manuísíwata.

³ Càmitaté wacàlidacué pirí cachìwéeri tàacáisi, càmita nacái watàanícué pirí wachìwáidacaténácué pía meedá, weedácaténácué píicha plata.

⁴ Néese Dios yáalimáidacaté iicáwa wía asáisi wáibaidacaalí irípiná machacàniri iyú, wía apóstolca. Néese idécanáamité cayábaca Dios iicáca iyúwaté wáibaidáaná irí, yá ibànùacaté wía wacàlidáanápínáté yái tàacáisi íiméerica Jesucristo

iwàsàaca wenàiwica Dios yàasu yùuwichàacáisi ícha. Iná yéewa wacàlidaca wenàiwicanái iríni. Càmita wáalimáida wasímáidacáita wenàiwica meedá wàasu tàacáisi iyúwa, néese wacàlidaca Dios itàacái càide iyúwa Dios iwàwáaná, yái Dios yáliérica wawàwa.

⁵ Píaliacué nacáywa càmitaté wachìwáidacué pía cachìwéeri tàacáisi iyú càide iyúwa èeri mìnaná iwàwáaná yéemìaca. Càmitaté wamàni càì weedáanápínacué pícha cawèníiri. Càmitaté nacái wamàni wawàsi íbàacanéri iyú weedácaténacué pícha plata. Càité wàyacué pèewibàa machacàniri iyú Dios iicá.

⁶ Càmitaté wawàwa wenàiwica naicáca wía iyúwa máiniyéica cayába áibanái ícha. Càmitacué wacutá pícha càiri, áibanái ícha nacái, íbatàa abéeri piná, éwita Dios imàacacáaníta walí cáimiétacanéri íibaidacalési, wía apóstolca. Càité nacái, éwita Dios imàacacáaníta walí íiwitáisewa wachùulìacaténacué pía cachàiníiri iyú, càicáaníta càmitaté wamàni càì.

⁷ Càmitaté wachùulìacué pía cachàiníiri iyú, éwita Cristo yàasu apóstolcáaníta wía. Néese watàanicatécué pírì éeréeri iyú. Wamànicatécué pírì càide iyúwa inanái udàwinàacaalí uénibewa, ucùa nacái nía cáininéri iyú.

⁸ Càité nacái cáinináca waicácuéca pía íná wawàwacaté wacàlidacuéca pírì Dios itàacái cayábéeri, yá wáibaidacaté macái wachàini iyúwa wayúudàacaténacué pía. ¡Yá wacàlidacatécué pírì Dios itàacái mamáalàacata cáininácáiná waicácuéca pía!

⁹ Píacué wéenanáica, píaliacuéwa wáibaidacaté wacáapi iyúwa mamáalàacata cachàiníiri iyú

wawènìacaténáté wayáapínáwa, wàyacaalíté pèewibàa. Càmitaté wawàwa wáinalaléca pírícuéni, íná wáibaidacaté èeríapinama, táiyápinama nacái ipíchanácué wacutáca pícha wayáapínáwa idècunitàacá wacàlidacatécué pírí Dios itàacái.

10 Píalíacuéwa amaléeri iyúni wàyacatécué pèewibàa machacàníiri iyú piicápinácué, mabayawanéeri iyú nacái Dios iicá.

11 Píalíacué nacáiwa wàalàacatécué pía, wamichàidacatécué píiwitáise, wachàiniadacatécué piwàwa, píacué abéechúanaméeyéica càide iyúwa náaniri cayábéeri íiwitáise imàníiná yéenibe iríwa.

12 Wàalàacatécué pía pimàníinápinácué càide iyúwa iwàwacutáaná Dios yàasu wenàiwica imànica, yái Dios imáidéericuéca pía icùacaténácué pía iyúwa Picuèriná, pìyacaténácué nacái Dios icamaláná mèlumèluíri írìcu chènuniré.

13 Iyaca áiba wawàsi nacái wèerica Dios irí cayábéeri ìwalíse mamáalàacata: Bàaluité péemìacanáamicué wacàlidaca pírí Dios itàacái, yáté peebáidacuécani píalíacáinátéwa Dios itàacáicani báisíiri iyú, càmita càide iyúwa wenàiwica itàacái meedá. Báisíta Dios itàacáicani, iwàlisàidéericuéca píiwitáise piwàwalícuésewa, píacué yeebáidéeyéicani.

14 Iná píacué wéenanáica, peebáidacáinácué Jesucristo itàacái, ínáté ìwalíse pìasu cáli néeséeyéi nàuwichàidacatécué pía, níái càmiyéica yeebáida. Yá piùwichàacatécuéwa càide iyúwa Dios yàasu wenàiwica nàuwichàanátéwa, níara yeebáidéeyéica Cristo Jesús itàacái Judea yàasu cáli ínata, bàaluitécáiná néenanái nacái judiónái nàuwichàidacaté nía ìwalíse yái neebáidáanáca Jesucristo itàacái.

15 Níara judíoca nanúacaté Wáiwacali Jesús, càide iyúwaté nàawirináimi inúanaté Dios yàasu wenàiwica profetanái icàlidéeyéicaté tàacáisi Dios inùmalicúise. Judíonái yùuwichàidacaté wía nacái, náucaca wía nacái nàasu cáli íichawa. Càmita namàni càide iyúwa casímáiná Dios iicáca. Nàuwideca namànica macái wenàiwica.

16 Macái imanùbaca wawàwacaalí wacàlidaca Dios itàacái càmiyéi judío irí, yéewacatená Jesucristo iwasàaca nía nacái Dios yàasu yùuwichàacáisi íicha, judíonái càmita namàaca wacàlidaca Dios itàacái càmiyéi judío irí. Càita máini namànica nabáyawanáwa, níai judíoca. Quéwa átata Dios yàasu yùuwichàacáisi máiníri manuíca idéca yàanàaca mawiéniré nalí, yàanàacatená nàwali mesúnamáita.

Pablo desea visitar otra vez a los de Tesalónica

17 Píacué wéenánáica, achúmacaté wawàwa iwàwacutácáinaté wàacawa píchacué, achúma èeripinaté, yáté éwita càmicáaníta waicácué pía, càicáaníta wawàwalicué pía mamàalàacata wawàwalicúisewa. Iná wawàwacaté wàacawa píatalécué máinicáinaté wawàwaca wapáchiacuéca pía.

18 Yáté wáináidacawa wapáchíanápinaté píacué. Núa, Pablo nuwàwacaté nupáchiacuéca pía madécaná yàawiría quéwa càulenacaté Satanás imànica nuíchani, íná càmitaté núalimá nùanàaca néré.

19 Wía apóstolca, máinité wawàwaca waicácuéca pía casímáicáinácué pimànica wawàwa wacùacáinácué wabàlùanápináwa píapicha Wáiwacali Jesucristo íipunita áiba èeriwa Wáiwacali

yàanàacaalípiná àniwa. Néenialípiná, ìmáiní casímáipináca wawàwa pìwalicué peebáidacáinácué Jesucristo itàacái tàì ìiméeri iyú!

²⁰ Báisíta, wacàlidapinácué piináwaná ìwali casímáiri iyú, pimànicáinácué máiní cayábéeri.

3

¹ Néeseté máiní nuwàwacaté nuémìlaca piináwaná ìwalicué, quéwa càmitaté núalimá nùaca nupáchiacuéca píá. Càmicáináté núalimá nuìdenìlaca mamáalàacata yái càmináca núalíawa, ínáté nuínáidacawa nuyamáanápínátéwa abéerita Atenas ìyacàlená néré.

² Yáté nubànùaca wéenasàiri Timoteo yeebáidéerica Jesucristo itàacái, ipáchiacaténácué píá. Yái Timoteo abéeri wéená wía íbaidéeyéica Dios irípiná, wía icàlidéeyéica yái cayábéeri tàacáisica Cristo iináwaná ìwali. Yáté nubànùacué pìatalé Timoteo imichàidacaténácué píiwitáise, íchàiniadacaténácué piwàwa nacái, yéewanápinácué peebáidaca Jesucristo itàacái mamáalàacata tàì ìiméeri iyú.

³ Nubànùacaté Timoteo pìatalécué yàalàacaténácué píá, báawacáichacué piwàwa piùwichàacái ìwalísewa, ipíchanácué piwènúadaca píiwitáisewa Jesucristo ícha. Píalíacuéwa ìwàwacutáaná wàuwichàacawa càì, wía yeebáidéeyéica Jesucristo itàacái.

⁴ Càita nacái bàaluté wàyacaalítécué píapicha, yáté wacàlidacué pirí áibanái nàuwichàidáanápíná wía, weebáidacáiná Jesucristo itàacái. Siùca píalíacuéwa wadéca wadàbaca wàuwichàacawa càide iyúwaté wacàlidáanácué piríni.

⁵ Iná càmicáináté núalimá nuìdenìaca quirínamani, yái càminácuéca núalía piináwaná ìwali, yáté nubànùaca Timoteo isutácaténácué yéemìawa pía yéewanápiná núaliácuéca piináwaná ìwali asásí peebáidacaalícué Jesucristo itàacái mamáalàacata tàì ìiméeri iyú. Nubànùacatécué pìataléni achúmacáináté nuwàwa nuínáidacawa pìwalícué cawàwanáta Satanás yáalimáidacatécué pía piwènúadánápinácué píiwitáisewa Jesucristo íicha. Càita Satanás iwàwa imànica yéewanápiná canáca iwèni, yái wacàlidéericuéca piri Dios itàacái bàaluité.

⁶ Quéwa siùcade Timoteo idéca yèepùacawa pìyacàle néesequé, yáara Tesalónica iyacàlenáca. Yá idéca icàlidaca walí cayábáanácué piináwaná peebáidacáinácué Jesucristo itàacái mamáalàacata tàì ìiméeri iyú, cáininácáinácué nacái piicáyacacawa. Idéca icàlidaca walí piwàwalínácué wía cáininéeri iyú mamáalàacata, máiní nacái piwàwacué piicáca wía càide iyúwa wawàwáanácué waicáca pía.

⁷ Iná píacué wéénánáica, éwita wàuwichàacáanítawa manuísíwata, càicáaníta wadéca wachàiniadaca wawàwawa, wía apóstolca, wéemìacáinácué piináwaná ìwali peebáidacuéca Jesucristo itàacái mamáalàacata tàì ìiméeri iyú.

⁸ Yá wáalimá wàidenìaca yùuwichàacáisi wéemìacáinácué piináwaná ìwali càminácué piméyáawa peebáidaca Wáiwacali itàacái tàì ìiméeri iyú.

⁹ Càmiripináta wayamáida wàaca Dios iri cayábéeri piináwaná ìwalísequé, yá nacái pimàninácuéca cayábéeri. Iná yéewa casímáica wía Dios iicápiná pìwalínácué.

¹⁰ Eeríapinama, táiyápinama nacái wasutáca Dios ícha manuísíwata imàacáanápíná waicácuéca pía watuí iyúwa wéewáidacaténácué pía mamáalàacata iwàwacutácáinácué píaliacawa áiba wawàsi ìwali peebáidacaténácué Jesucristo itàacái tàì íméri iyú.

¹¹ Wía apóstolca, wawàwaca Wáaniri Dios, Wáiwacali Jesucristo nacái nayúudàaca wía yéewanápiná wáalimáca wapáchiacuéca pía mesúnamáita.

¹² Wasutá Wáiwacali ícha pirípinácué, imàacáanápínácué cáinináca piicáyacacawa cachàiniwanái mamáalàacata, càita nacái cáinináanápínácué piicáca áibanái wenàiwica canánama, càide iyúwa cáinináná waicácuéca pía.

¹³ Càita nusutáca Wáiwacali ícha pirípinácué ichàiniadánápínácué píiwitáise, yéewanápinácué mabáyawanáca Dios iicáca pía Wáiwacali Jesús yàanàacaalípiná macáita yàasunái mabáyawanéeyéi yápichawa èri imáalàapínácaalíwa. Báisita, amén.

4

La vida que agrada a Dios

¹ Siùcade píacué wéenánáica yeebáidéeyéica Jesucristo itàacái, wasutácué píicha wawàsi manuísíwata, wàalàacué pía nacái Wáiwacali Jesús inùmaliçúise. Piyacué machacàníri iyú cachàiniwanái mamáalàacata casímáicaténácué Dios iicáca píiwitáise càide iyúwacué pidàbáanáté piyaca péemiàcanacáitacué wéewáidaca pía.

² Péemiàcatécué cayába yái tàacáisi wacàlidéericatécué pirí Wáiwacali Jesús inùmaliçúise.

3 Dios iwàwacué pìyaca mabáyawanéeri iyú píibaidacaténacué abéerita irípiná. Càmita iwàwacué piimáca áiba yáapicha cà mírica pinìrisíwa, cà míchúa nacái píinusíwa.

4 Càita Dios iwàwacué pìyaca, yéewanápiná cawinácaalí asìali iwàwéerica icásàacawa yáalimá yeedáca iríwa ínupináwa mabáyawanáwaca, iyacaténá úapicha cáimiétaquéeri iyú.

5 Aibanái wenàiwica cà míiyéica yáalíawa Dios ìwali needáca inanái máinicáiná nawàwacáita naimáca náapicha meedá. Càmita báisí naicáyacacawa cáimiétaquéeri iyú. Picácué pimàni càì.

6 Picácué nacái piimá áiba asìali ínu yáapicha, càita nacái áiba inanái inìri yáapicha. Pimànicaalícué càiri báawéeri áiba wenàiwica irí, yásí Wáiwacali yùuwichàidacué píawa manuísíwata, càide iyúwacué wàalàanáté pía cáimiétaquéeri iyú.

7 Dios càmita imáida wía wamànínápiná wabáyawanáwa casaquèeri iyú, néese imáidaca wía wàyacaténá mabáyawanéeri iyú, yéewanápiná wáibaidaca abéerita irípiná.

8 Yái tàacáisi nùalèericuéca iyú pía, cà mírita meedá wenàiwica yàasu tàacáisi, néese Dios itàacáicani, íná cawinácaalí cà mírica yeebáida yái tàacáisi, idéca yúucaca íchawa Dios, yái Dios ibànuèericuéca Espíritu Santo piwàwaliculé. Yái Espíritu Santo ípidená ímáanáquéi “Yái Mabáyawanéerica” ímáanáca, Espíritu yàanàcáinaté mabáyawanácaténá imànica wía.

9 Quéwa càmita iwàwacutá nùalàacuéca pía cáinináanápinácué piicáyacacawa Dioscáiná idéca yéewáidacuéca pía càì, íná nùalíacawa cáininácuéca piicáca áibanái yeebáidéeyéica Jesucristo itàacái.

10 Wáaliacawa cáininácuéca piicáca macáita wenàiwica yeebáidéeyéica Jesucristo itàacái iyéeyéica Macedonia yàasu cáli ínata. Quéwa wasutácué pícha wawàsi manuísíwata, piacué wéenanáica, cáinináanápinácué cachàiníwanái mamáalàacata piicáca macáita yeebáidéeyéica Jesucristo itàacái.

11 Píalimáidacué piyacaténá matuíbanáiri iyú áibanái yáapicha. Picácué máini pisutáida péemíawa áibanái yàasu tàacáisi ìwali, néese piibaidacué picáapi iyúwa càide iyúwaté wàalàanácué pía.

12 Píibaidacué cachàiníiri iyú yéewanápiná áibanái càmiyéica yeebáida Jesucristo itàacái naicácuéca pía cáimiétaquéeri iyú, pidèniàcaténácué nacái yái pimáapuèrica, ipíchanácué picutáca piyáapínáwa áibanái ícha.

El regreso del Señor

13 Píacué wéenanáica, wawàwacué píaliacawa càinácaalí nàyáanápiná níara yéetéyémicawa yeebáidéeyéicaté Jesucristo itàacái achúmacáichacué piwàwa manuísíwata càide iyúwa achúmáaná èeri mìnaná iwàwa càmiyéica yeebáida Jesucristo itàacái. Achúmaca nawàwa manuísíwata càmicáiná nacúa néenanáimi imichàacawa yéetácáisi ícha.

14 Wadéca weebáidaca Jesús iináwaná ìwali yéetácátéwa, néese imichàacaté nacáywa yéetácáisi ícha. Càita nacái weebáidaca Dios imichàidáanápiná yéetéyéimiwa yéetácáisi ícha, níái yéetéyémicawa yeebáidéeyéicaté Jesús itàacái. Nacáucami yàanàpiná Jesús

yáapicha namichàacaténáwa yéetácáisi ícha Jesús yàanàapinácaalí àniwa.

¹⁵ Iná wacàlidacué pirí yái tàacáisi càide iyúwa Wáiwacali yéewáidáaná wía: Wía cáuyéicáwaca mamáalàacata cháí èeri irìcu Wáiwacali yàanàacaalípiná, càmita wàawa napíchalé chènuniré níái yéetéeyéimicawa yeebáidéeyéicaté Jesucristo itàacái.

¹⁶ Wéemìapiná chènuníiséri tàacáisi imáidéerica wía cachàiníiri iyú, yá ángel íiwacaliná imáidapiná nacái wíawa, yá nacái Dios yàasu trompeta casànapiná wéemíawa napulíacaalíni. Yásí Wáiwacali iricùapináwa chènunibàata. Néese níái yéetéeyéimicawa yeebáidéeyéicaté Cristo itàacái, níata idàbapiná icáucàacawa quéechacáwa.

¹⁷ Néese wía cáuyéicáwaca wamichàapinácawa náapichawa cáuli irìculé, wawàlùacaténáwa acalèe yèewiré wáipunitáidacaténá Wáiwacaliwa capíraléeri cáli ínatalé. Càipiná wàyaca Wáiwacali yáapichawa càiripináta.

¹⁸ Iná pichàiniadacué piwàwawáaca iyú yái tàacáisi cayábéerica ipíchanácué máini achúmaca piwàwa péenánái yéetácaalíwa píicha.

5

¹ Píacué nuénánáica yeebáidéeyéica Jesucristo itàacái, càmitacué iwàwacutá nutànàaca pirí tàacáisi ìwali yái Wáiwacali yéenáiwánaca yàanàacatáipináta, càisimalénácaalí camuí ìya wapíchalé.

² Píalíacuéwa cayába canáca èeri mìnánái yáaliériwa càicaalínápinácaalí Wáiwacali yàanàaca àniwa. Càide iyúwa cayéedéeri yàanàacaalí táiyápi càmicatáita wenàiwicanái ínáidawa ìwali, càita nacái

Wáiwacali yàapináwa néese àniwa càmicatáita èeri m̀nanáí ic̀ua yàanàaca.

³ Néenialípiná wenàiwica nacàlidapiná càì: “Cayába macáita. Canáca ùwicái. Wàyaca matuíbanáita”, càipiná náimaca. Néese ráunamáita ỳuwichàacáisi yàanàapinácawa nàwali cáiwíiri iyú imáalàidacaténá nía, càide iyúwa inanái idàbacaalí ỳuwichàacawa isicúasiwata umusúadacaténá iicá èeri. Yásí càmita náalimá napìacawa Dios yàasu ỳuwichàacáisi íicha.

⁴ Quéwa píacué wéenanáica càmitacué catá píiwitáise, píalíacáinácúewa Dios ìwali. Iná càmitacué Wáiwacali yéenáiwaná icalùada píawa, yàanàapinácaalí càide iyúwa cayéedéeri icalùadacaalí wenàiwica.

⁵ Amalácáinácué píiwitáise macáita, píalíacáinácúewa Dios ìwali, picùacáinácué nacái Wáiwacali yàanàaca. Càmita wàya càide iyúwa catéeyéi íiwitáise ìyáaná, càmíiyéica yáalía Dios ìwali.

⁶ Iná iwàwacutá wamichàidaca wáiwitáisewa wac̀uanápiná Wáiwacali yàanàaca. Picácué wàya iyúwa iiméeyéi meedá, càmíiyéica ic̀ua Jesús yàanàanápiná. Yá waicáidacué Wáiwacali íipunitawa cáalíacáiri iyú, wac̀uacaténá wíawawa ipíchaná wawènúadaca wáiwitáisewa Wáiwacali íichawa.

⁷ Aibanái catéeyéica íiwitáise càmita náalíawa Dios ìwali. Càica níade iyúwa wenàiwica iiméeyéica meedá táiyápinama, iyúwa nacái wenàiwica icàméeyéica catéeri irìcu.

⁸ Quéwa wía amaléeyéica íiwitáise, icuèyéica nacái Wáiwacali yàanàanápiná, iwàwacutá wac̀uaca wíawawa cayába ipíchaná wamànica

wabáyawanáwa. Iwàwacutá weebáidaca Jesucristo itàacái, càita nacái cáininácué waicáyacacawa, càita nacái manuícué wáináida wawàwawa Jesucristo ìwali iwasàanápíná wíawa Dios yàasu yùuwichàacáisi ícha. Wamànicaalí càì, yásí wacùapíná wíawawa cayába Satanás ícha ipíchaná wamànica wabáyawanáwa, càide iyúwa úwisàiri ìwalicaalí icàyuwaniwa, ibàle nacáíwa dàaléeri hierro nacáiri icùacaténá yáawawa yùuwidenái íchawa.

⁹ Dioscáiná càmítatè yeedá wía yàasunáipínáwa imàacáanápíná yàasu manuírì yùuwichàacáisi yàanàaca wàwali, néese idéca yeedáca wía iwasàacaténá wía yàasu yùuwichàacáisi íchawa ìwalíse yái Wáiwacali Jesucristo yéetáanácawa wáichawalíná.

¹⁰ Jesucristo yéetácatéwa wáichawalíná wàyacaténá yáapicha càiripínáta, éwita nacái wéetácaalíwa, càita nacái cáucaalícáwa wía áiba èeriwa Jesucristo yàapínácaalíwa néese àniwa.

¹¹ Iná pimichàidacué píiwitáisewáaca mamáalàacata, pichàiniadacué nacái piwàwawáaca càide iyúwa pimànínacué piacawa siùcade.

Pablo aconseja a los hermanos

¹² Píacué wéenanáica wasutácué pícha wawàsi manuísíwata, piacué ancianonái límiétacaná, níai íbaidéeyéica Dios irípiná pèewibàa, nacùacaténácué pía, nàalàacaténácué pía Wáiwacali itàacái iyú, piacué yeebáidéeyéica Jesucristo itàacái.

¹³ Iwàwacutácué piaca ancianonái límiétacaná, cáininácué nacái piicáca nía manuísíwata ìwalíse yái íbaidacalésica namànírica Dios irípiná,

yái nacùanácuéca pía. Pìyacué matuíbanáita píapichawáaca.

14 Wachùuliacué pía, píacué wéénánáica, píalàacué cachàiníiri iyú níara péená càmiyéica iwàwa íbaidaca. Pichàiniadacué nawàwa nacái cawinácaalí achúméeyéica ínáida iwàwawa, nàuwichàacái ìwallisewa. Piyúudàacué nacái níara machawàaquéeyéica íiwitáise, càmiyéicáwaca yeebáida tàì íméeri iyú. Pimànicué macáita irí éeréeri iyú mamáalàacata.

15 Aibanáicaalí imànicué pirí báawéeri, picácué pimàni irí báawéeri nacái píipuináwa, néese píalimáidacué pimànica cayábéeri piríwáaca càiripináta, macái wenàiwica irí nacái.

16 Cayábacué piwàwa càiripináta.

17 Pisutácué píawawa Dios íicha mamáalàacata.

18 Pìacué Dios irí cayábéeri càinácaalícué pìyáaná, càicáinácué Dios iwàwa pimànica, píacué yeebáidéeyéica Cristo Jesús itàacái.

19 Càide iyúwa càmicaalí wachacàida cayábéeri quichái iyúudèrica wía, càita nacái picácué pimáalàida píichawa yái cayábéerica Espíritu Santo imànírícuéca piwàwalícuíse.

20 Picácué caná iwèni piicáca nataacái níai wenàiwica Espíritu Santo ichàiniadéeyéica nacàlidacaténá tàacáisi Dios inùmaliícuíse.

21 Quéwa píináidacuéwa cáalíacáiri iyú ìwali macái tàacáisi péemièricuéca píalíacaténácuéwa asáisi báisícaalí Dios itàacáicani, néese peebáidacué abéerita yái cayábéeri tàacáisica.

22 Piwènúacuéwa macái báawéeri íiwitáaná íicha.

23 Wasutáca Dios íicha pirípinácué, yái Dios matuíbanáirica imànica wáiwitáise,

masacàanápínacué imànica píiwitáise
 píibaidacaténacué abéerita Dios irípiná,
 icùanápínacué nacái píiwitáise manuísíwata,
 piwàwa nacái, piiná nacái mabáyawanéeri iyú
 àta Wáiwacali Jesucristo yàanàacataléta àniwa.

²⁴ Càipiná Dios imànicuéca piríni. Yái Dios
 imáidéericatécué pía yàasunáicaténacué pía,
 imànipínacué pirí macáita càide iyúwa icàlidáanacué
 piríni.

Saludos y bendición final

²⁵ Píacué wéenánáica, pisutacué Dios ícha
 walípiná nacái.

²⁶ Pitàidacué cayábéeri iyú macáita wenàiwica
 yeebáidéeyéica Jesucristo itàacái.

²⁷ Nuchùullacué pía Wáiwacali inùmaliçuise,
 piléecué yái nùasu cuyàlutaca nalí macáita níara
 yeebáidéeyéica Jesucristo itàacái.

²⁸ Yá wasutáca Wáiwacali Jesucristo ícha
 pirípinacué, imànínápínacué pirí cayábéeri
 mawèníri iyú.

**El Nuevo Testamento de nuestro Señor
Jesucristo en el idioma piapoco
New Testament in Piapoco**

copyright © 2009 Wycliffe Bible Translators, Inc.

Language: Piapoco

Translation by: Wycliffe Bible Translators, Inc.

Piapoco

pio

Colombia

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Piapoco

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files dated 29 Jan 2022

15b1335d-e064-57a2-9f7f-a5383125b741